

約章成案匯覽

約章成案匯覽乙篇卷五上目錄

章程

交際門 優待保護類

總署咨英國擬定酬賞救護失事洋船章程文

同治八年
附章程

總署咨英國酬賞護救洋船失事章程布圖未能允准文

同治八年

閩省擬定救護中外船隻章程

光緒二年

廈門保商局章程

光緒二十五年

江南商務局章程

光緒二十六年

約章成案匯覽乙篇卷五上

章程

交際門 優待保護類

總署咨英國擬定酬賞救護失事洋船章程文

同治八年
附章程

為咨行事同治八年三月三十日准閩浙總督來咨以閩省
為濱海之區各國洋商往來絡繹不絕其因遭風觸礁損壞
者亦事所常有唯船隻一經遭險失事所載貨物勢必四散
漂流無可救護附近華民事後撈拾在華民未知何項船隻
所失貨物遂各分散無存迨地方官知有洋人失事按照條
約馳往保護而貨物已經分散無從追起送還是以每遇洋

船失事之案辦理諸多棘手茲據英國領事送有定例查核所列酬賞撈拾功勞章程各條尚屬妥協堪以引用現飭沿海各府廳州縣一體照辦計送清摺一扣咨明查照立案前來查洋船遭風不獨閩省每遇失事貨物漂流附近華民不知何船所失往往撈拾分散迨經地方官急為保護而貨物業已無存追獲為難辦理殊多費手自應明定章程通飭各省沿海府廳州縣曉諭附近華民隨時保護該華民知有酬賞自必將所拾貨物如數呈繳茲聞浙總督抄送英領事所遞章程尚屬妥協堪以引用相應照錄原文並抄單一件咨行即飭各省沿海地方官一體照辦並知照各口領事官可

也須至咨者

右咨各省

照譯英國擬定酬賞失事洋船章程五條

同治八年

一如有英船破壞附近華民可以向前代原英商收拾貨物等件

一收拾貨物之華民應將所拾物件開列清單報明附近英領事官指明該貨應交何英商

一該英商前往該處收拾之華民即將該貨若干交還向該英商取討收單送交領事官查辦

一該貨收到應由領事官飭令該貨或售賣或估價按照價

錢多寡核華民收拾工夫之輕重秉公斷給功勞之資若干
一按照英例功勞之資功勞少者八份應給一分功勞多者
八份應給七份其中按物按工按照時勢應斟酌秉公斷給
總署咨英國酬賞護救洋船失事章程布國未能允准文同

八年

為咨行事案查本年三月間准閩浙總督咨稱濱海之區各
洋艘遭風觸礁損壞者貨物四散漂流附近華民事後撈拾
據英國領事送有酬賞撈拾功勞章程條款合就照抄英國
定例具文呈送查核等因經本衙門咨行轉飭各省沿海地
方官一體照辦在案茲據布國照會稱以此章程施於北德

意志公會各國船隻尚難應允蓋以英國所定報謝錢之數甚重北德意志公會領事官如定此報謝之錢數不能過德意志通商律例書內至多者係一半之數等語本衙門業已照覆布國李使以酬賞撈貨功勞一節和約內原未載有此項章程英領事恐洋船觸礁遭風華民不肯盡力救援按照英國定例開列取討功勞銀數條款貴大臣既以英國所定之錢數為過重本大臣即咨行南北通商大臣轉飭各口將英布報謝之錢數分別示知海岸華民相應咨行查照轉飭分別辦理須至咨者

右咨各省

閩省擬定救護中外船隻章程

光緒二年

一定地段以專責成也查沿海島嶼星羅犬牙交錯非明定
界址必彼此推諉茲責成沿海廳縣會同營汛定明所轄界
限每十里為一段飭令就近公正紳耆保舉地甲一人其島
嶼則保舉耆老頭目一名列名冊報以專責成凡遇中外船
隻漂撞礁淺一切危險本船日則高掛白旗夜則接懸兩燈
以示求救近地之居民漁戶人等見有此等旗燈即時首報
地甲頭目一面飛報文武汛官一面酌量夫船數目集腋助
救其文武汛官聞報後亦即督率兵役親往勘驗救護不得
稍有遲誤其往來報信之人一切費用均由失事船主給還

惟官役不得勒索使費

一明賞罰以免推諉也查沿海文武汛官如有救護船貨至一萬兩以上中外人等救至十名以上者一經該管上司查明申報及領事官照會閩道有案藩司立即註冊記功三功以上者文武汛官詳請酌給外獎五功以上者分別詳請

題升以示優獎其地甲頭目亦分別上次勞績隨時賞給頂戴匾額以昭激勸倘文武汛官不肯認真辦理照例參懲地甲頭目若有救援不力甚至希冀分肥者分別輕重嚴究至於望見船隻危險首先報知地甲頭目及文武汛官者以初報之人為首功由失事船主給予花紅大船多至三十兩小船

以十兩為度

一定章程以免混亂也凡遇險船隻其力尚可自存船主並不顧他人上船者則救援之人自不得混行上船僅船主須人救援或係應先救船或係應先救貨或係應先救人均聽船主指揮不得自行動手救起貨物應寄何處亦由船主作主其有擅行搬取或私自藏匿者一經船主及地甲頭目指明查有確據者即行由官追究治罪倘有人出首確鑿者亦賞以應賞之款誣捏者並行反坐

一定酬勞以資鼓勵也凡救起之貨須俟文武汛官驗報如係外國船貨則並報明附近領事官會同查核將貨估價按

照出入多寡難易抽撥充賞至多三分之一賞救援之人若有貨無人則須稟明就近地方官及領事官秉公將貨酌賞僮無貨有人則須將人救護無論中國外國之人均先行給以衣食就近送交地方官領事官妥給船夫分別資送回籍僮係外國人無領事可交者即報明通商局資給盤川俾令自行回國其小船出力救護者僮本人無力可以酬謝即就近稟報地方官小船每救人一名賞給洋銀十元就近由地方官先行核給按月稟報通商局撥還虛捏者嚴究至遇風濤洶湧人力難施或在大洋為救援所不及者均宜各安天命不得任意株連

一廣曉諭以資勸戒也凡海濱愚民皆緣不知救援之有賞不救之有罰是以坐視不救或致乘機搶奪此後所有沿海文武各官均宜將以上告示條規分別劄行各汛嚴加告誡並將告示條規書寫木牌徧處懸掛使一切漁戶愚人皆知遇險之船救護為有功不救護為有罪庶人人有救船之念在其胸中不致視為無足重輕之舉矣

廈門保商局章程

光緒二十五年

一時會所趨商務為重本局名為保商專為便商而設惟廈門為總匯之所樞紐中外而行商坐賈大都分隸漳泉事權不一難期呼應靈通自應稟請汀漳龍及興泉永兩道憲會

銜督辦並就近請由廈防廳憲主持其事

一局內一應稟函須有憑信自應刊刻木戳大小各一顆文曰廈門保商總局戳記封存櫃內由委員主持蓋用

一局中面請憲示以及行文登報款接紳商料理雜務不能無主其事者擬請道憲遴委委員一人公請總司局務二人司事一人僱用厨役一名雜役二名司閤一名應給薪水修金辛工一俟定議報明道憲並繕單懸示局中以便周知至報稅出貨非熟悉其事者不可應由途郊公議延請

一商務情形非身親其事者不能熟悉底裏廈門向分十途現存其八自應各途公舉行東管事一二人不拘時候分班

來局會議其有通達時務素負時望或在途或不在途除將現時所知者公請入局會議外此後不拘何人務望不吝珠玉俯賜光臨共濟時艱

一商務繁雜原不盡於途郊其一應販運各色人等舉凡有利應興有弊應除均可隨時來局商辦一律接待斷不岐視一各商一應切己之事來局陳訴務須蓋用本號圖章尤須號東管事人親身到局畫押

一本局之設仰承本道憲憚商由汀漳龍道憲榮總攬大綱規模宏遠自應公私兩益可大可久其創興大利俟有成效公議抽分生息以濟局用其追償欠款皆按九五抽用隨時

撥交洋北疋三郊鑪主積有百元即按八釐行息現時開局暫由本道憲籌款三千元以一千存公備用以二千分撥洋北疋三郊生息

一自子口單盛行於是華商之欲置貨出洋者因海關釐局完稅抽釐成本較重而且留難阻滯弊竇叢生勢不得不寄名洋商影射取巧擬查明准走子口各貨由局出單名曰采買出洋貨照准往內地采買其應完洋關進出口稅報由本局轉向洋關查照子口代完稅則局內設有棧房一所代商屯貨一如洋行之例其經管棧貨之人由途公舉

一百貨之應完釐金常稅者應由各商詳陳利弊應否由局

查照貨物為出憑單自行投納以絕紛擾之弊統容會商詳議核辦

一過水販客來廈采買零星物件應由出售本號或由本客將發單呈驗加蓋局戳以免關局哨丁詐索之弊

一官商勢分隔絕必須官權商情兩無妨礙方為有濟本局意主便商所有興利除弊以及清理虧欠等事均由本局知會各商來局查照章程參酌情理公同定議稟請憲示一面函請地方官照辦以歸簡易而省使費

一廈門期帳多有違約此後如有誤期及輾轉延宕者准由該號來局聲明列單繕挂以杜奸巧

一商賈貿易惟憑招牌此後無論行商坐賈皆須來局報明
字號其有諧聲象形意存冒混者准由被害各號呈明作偽
之姓名住址由局請官勒限改易如敢抗違立予標封科罰
充公

一向章入途須充公費現時新舊雜沓一時驟難清釐應俟
局務大定方可相機核議

一廈門行店林立多財善賈往往株連賠累推原其故由於
轉販分運類多借貸微資因人成事或託名夥開或借親友
聲援遽爾賒取貨物大張門面其實左支右絀不可一日擬
在局設立商賈表本在十萬以上者列一表五萬以上者列

一表一萬以上者列一表一萬以下至數百元者統列一表
其不願列表者聽至東家為誰管事為誰有無附股各應詳
晰開明送局註冊其有更易者隨時至局聲明聽行郊人等
任便查閱庶幾共見共聞以便交易往來其賒入貨物借貸
銀錢可先將交際情形報局存查如有被人倒欠無論在廈
在漳在泉准即由局稟請道憲分飭廳縣追究設因周轉不
及歇業者亦可由局查明情由分別清理其未來局聲明者
不論人欠欠人本局概不與理

一廈門行郊生理多與漳泉兩府鋪商交易往來則漳泉行
郊亦應帶其來局列冊備查其有人欠欠人當與廈門行郊

一律辦理事不在廈者不在此例

一出洋茶紙等類同一貨物各號標識不一分門別類往往多至數十雷同假冒奸巧叢生務須列明存局庶有查考如
有意存弊混或經本局查出或經各商指究立請地方官查
封究辦

一廈門市場為中外輻輳南北營運樞紐之地所有上海天津營口煙臺香港臺灣呂宋及東西洋各處一切行規貨價漲落均應隨時詳晰開列註入局冊以憑考核凡有輻輳不清帳目均准在局會算以免爭執

一商務暢行輪艘裝運應否轉租應用抑或籌集本銀自行

製造聽由中外行郊悉心籌畫來局定議核辦

一商旅挾帶資本無可存寄者不妨徑會來局暫為代收妥議章程分存兌號及著名殷實行郊所有存項本利任便取回

一凡有與本埠交涉之口岸無論中外其有關市面之電報均可徑達本局由本局即時鈔送應閱各號一面繕挂局內以供衆覽其欲徑送一號收閱者亦可代為轉送不使洩漏亦可由局轉電各處

一船戶把持脚夫刁詐最為商販之害何處應設總行何事應設夫頭聽由各途妥議章程以憑稽查呈明本局商請地

方官竭力維持

一保護番客最為現時要務稔知漳泉一帶由洋回里者種種受害不勝枚舉貧民出洋謀生焉有巨欠一經得意歸來公欠私欠及連年不可知之數從何核實乃族鄰姻戚紛紛借貸稍不如意情偽百出即如一營造也不以為妨礙風水即以為強霸侵占甚至一呈到官委員行查標差拘訊勒完逃糧附名命案暗無天日實堪髮指擬由局函知東西洋會館首董其有在外營運回里准由該首董電知本局一面供給文憑黏貼照相來局投驗以憑換給護照其隨帶行李不准司巡藉端搜查勒索留難至渡載挑運概由本局照料並

請道憲將以前受害一切弊端詳請奏明責成各該地方官妥為保護如有以上受害等情准由受害之人來局稟明立予查辦

一邇來婦女幼孩出洋難保無奸民設計誘拐抑良為賤淪落異地大傷天和自後幼孩婦女出洋應由該家長取具保家赴局報明年歲及出洋事故加蓋局戳方准上船應請道憲照會稅務司及各國領事知照如遇婦女幼孩搭船查無局戳即予扣留

一商務漸擴其有議興鑛廠購用機器製造者均可隨時來局妥籌創辦

一局務草創一應辦法原難懸擬現擬章程挂一漏萬實屬
簡率自應隨時酌改添入惟以所擬辦者畧舉大意開列於
右

江南商務局章程

光緒二十六年

明商律

一凡借本及存人資本與糾立公司營運商業者如果侵蝕
資財託名虧折專支濫用倒閉捲逃一經被累人控告審實
先行遵照

商憲前次批准章程將虧欠人先摘頂戴歸案訊辦仍遵此
次

戶部奏定章程勒限追欠逾限詳革定罪追欠於繳到欠款內十分提一歸局充公

一凡以低偽貨物假冒招牌仿帖有礙本人聲名事業者經本人查獲實據控告審實按照作偽律分別所冒事業大小本人受累輕重辦理其代作牌帖人分別知情不知情的量查辦封罰款項充公

一凡商業行戶藉勢爭利把持市面經人控告審實按律分別罰辦罰款充公

一凡因商業先在地方官衙門涉訟書差苛索有據一經控告到局即由局移行地方官復審得實追贓給還本人仍按

情罪輕重由該管州縣分別懲辦如涉迴護申詳通商衙門
察究

一凡商販經過關卡貨物照數遵章完納稅釐外如有司事
杆手巡丁藉詞加載隱瞞留難需索一經控告到局即由局
移提司事杆巡交地方官審實追贓給還本人仍按情罪輕
重分別懲辦如該關卡庇護或地方官瞻徇申詳通商衙門
察究

一凡華商與洋商因錢財涉訟者由本局律師隨去會同租
界發審委員審明分別辦理其律師訟費堂費隨時由商自
行訂給

開商學

一凡商人願仿西法自行捐資設立學堂講習商學者報明本局立案俟有成效分別捐資多少照章詳請

商憲奏咨給獎

一凡商人子弟在本國商學堂畢業願往各國考察商學以求進步者由本局詳請通商衙門給予獎牌咨送駐紮各國出使大臣送該國商學堂學習一面呈報

總署立案俟該學生畢業咨回作為本局考察商務員司來往資斧於本局罰充公款內酌量撥給其在外洋商學堂火食零用仿照西例學生自備

廣商報

一凡有關商務

諭旨南洋及各省商務奏議並本局公私文函分期編錄

一凡進出口貨物由稅務司按旬申報由本局詳譯以便年終查考

一凡中外市價商情據各業市單各州縣商民函報及各國報章擇錄隨時登報

一凡西人專門商學商法及理財富國學等書分類附報詳編

一凡每期商報除甯屬各州縣由本局札發外其蘇安西各

屬詳請

商憲札飭各該藩司分別轉發大縣十二分中縣八分小縣六分報費由各藩司彙解本局

一凡日報刊發應登條陳章程及各業告白外來登報者照申報例收半價

通商情

一凡江甯上海各商業向有公所各公所董事除報明本局給諭外另立一總公所由本局舉總董六員各公所分舉一員常川駐所以便議事如各商業有妨礙不便之弊及推廣可興之利准報由總公所隨時來局陳明商辦

一凡通商各埠及各州縣商業如有利弊隨時由各業公所董事條陳酌量移商各該管地方或稟

商憲察奪施行

濬商源

一凡江安西各州縣物產何物最旺何物最良應市銷行何物最暢何物最貴由各地方官查明於行文後三箇月內造冊呈報以後按年冬季造報一次

一凡江安西各州縣如有精巧工匠家傳專門藝術及以新意改良能抵外洋者由各州縣報明准將所製器物呈送本局驗明詳請通商衙門給予獎牌咨呈

總署存案並酌定專利年限

一凡農植物產工作器皿合銷外埠而本處偏僻道路不便及衙胥卡役刁紳劣監需索規費准其報局查實以憑核奪

一凡某處物產合仿西法製造各項用物如製茶壓油紡紗打米造紙造糖洋鐵洋膜洋燭洋火之類各該處官紳商民報明查實准創議人承辦視利大小給予專利年限大者十年中六年小三年限內續辦者報名酌定查辦

合商力

一凡各業皆應用大商包小商之法各立公所凡貨物牌號高低隨時由各公所董事會同各商及總公所總董評定價

值漲落公議定奪不得任意抬價跌盤

一凡能立公司創成一業抵制外洋須官保護者創立之始報明本局立案給予憑照隨時保護

一凡創辦公司商業有關民生利益一時商力不足者報局查明地方官及刁紳劣監從中阻撓者准其隨時據實陳明本局以憑核辦為是

一凡能立公司創成一業開通風氣抵制外洋者分別利益大小及資本多寡詳請

商憲照章

奏獎以資鼓勵

約章成案匯覽乙篇卷五下目錄

成案

交際門 優待保護類

外務部奏謹擬 恩賜各使臣及其眷屬游譙事宜摺 光緒二十八年

署南洋大臣張奏日本救護秘船拐帶華民已全數帶回資遣
回籍摺 同治十一年

閩督許奏設廈門保商局摺 光緒二十五年

南洋大臣鹿附奏設立商務局兼管南洋保商事宜片 光緒二十六年

商部奏請 旨通飭保商摺 光緒二十九年

出使美國大臣梁附奏請獎勵駐秘通惠總局紳商資遣華民

回國片 光緒三十年

盛京將軍增等會奏日俄戰事經過地方分別賑撫保護摺 光緒

三十年

出使英法大臣郭咨英屬議收華民丁稅已照會英外部設法

禁止文 光緒五年

出使英法大臣曾咨英屬議收華民丁稅與例不符已作罷論

文 光緒五年

出使英法大臣曾咨英屬議收華民丁稅已議不准行文 光緒

五年

附錄英國外部照會

光緒五年

總署咨各省洋人居住地方凡遇考試地方官認真彈壓保護

文

光緒十二年

出使英法義比大臣薛咨擬請英員保護智利厄瓜多流寓華

民文

光緒十七年

出使英法義比大臣薛咨英員允許保護厄瓜多流寓華民文

光緒十七年

出使英法義比大臣薛咨與法外部議除越南等處華民身稅

文

光緒十八年

出使英法義比大臣薛咨與英外部請刪除加那大苛待華民
新例文 光緒十八年

粵督陶咨美國禁阻華工之約將屆期滿請酌核辦理文 光緒
二十七年

出使英義比國大臣張咨新嘉坡回華商民准給護照俾沿途
關卡不得刁難勒索文 光緒二十八年

外務部咨古巴商民稟請立約保護咨行妥辦文 光緒二十九
年

外務部咨駐津日本領事代保護韓國商民轉飭遵照文 光緒
三十年

外務部咨轉飭各口遇有俄國紅十字會船隻進口按約辦理
文光緒三十年

外務部照會日俄公使允認紅十字會前往戰外各地文
光緒三十年

東撫周咨戰境商棧貨財應由戰國保護請商日俄公使查照
文光緒三十年

俄雷使照會旅歲華民身命財產已飭屬盡力保護文
光緒三十年

新嘉坡總領事劉玉麟請通飭保護南洋回籍商民稟
光緒二十五年

寓美華商呈華工禁約已滿請力爭補救稟

光緒二十七年

約章成案匯覽乙篇卷五下

成案

交際門 優待保護類

外務部奏謹擬 恩賜各使臣及其眷屬游譙事宜摺

光緒

二十八年

奏為謹擬

恩賜各國使臣及其眷屬游譙事宜請

旨遵行恭摺仰祈

聖鑒事竊查各國駐京使臣及其眷屬歷蒙

皇太后

皇上賜以

覲見復奉

皇太后懿旨令各使館內眷於本年五月初五日進謁

宮廷隨同游燕

隆施異數宸海同欽臣等伏維古者賓禮以親邦國朝覲聘問均
有燕饗之儀東西洋各國歲時公燕暨舉行聽樂觀舞賞花
等會凡各國公使及其眷屬皆與焉雖中西體制間有不同
而樽俎聯歡情誼自更周浹中國與各國使命往來近益加
密臣等仰體

朝廷德意謹就中西交際事宜詳慎參酌除各使臣籲懇

覲見隨時仍照向章辦理外所有各國公使及參贊隨員並各國公使之妻及參贊隨員諸內眷擬請

聖恩特賜游譙並請於每歲上半年之三四月下半年之八九月欽定日期由臣部屆時知照各使臣欽遵以

錫寵光而昭睦誼謹將臣等酌擬游譙事宜請

旨遵行緣由恭摺具陳伏乞

皇太后

皇上聖鑒訓示謹

奏

光緒二十八年五月初一日奉

硃批依議欽此

署南洋大臣張奏日本救護秘船拐帶華民已全數帶回資

遣回籍摺 同治十一年

奏為華民被拐出洋派員全數帶回資遣回籍仰祈

聖鑒事竊查接管卷內據蘇松太道沈秉成稟同治十一年八月

十二日日本官鄭永甯來道述及秘魯國瑪也西船由澳門

行抵日本橫濱海口有華人自船投水經英國兵船官員候

仁彤救起詢係被人拐賣同船華民二百餘人伊恐到秘魯

受苦是以投水由駐日本之英國公使知會經日本官將該

船扣留被拐之人盡收上岸緣秘魯係無約之國遂會同英

美兩國領事訊辦並函致鄭永甯詢問中國官如何辦理速寄回信等語當經前署通商大臣何璟以秘魯國係無約之國乃私在中國澳門地方拐人出洋既經日本國扣留保護自應派員往辦以答鄰好而衛民生當即遴委補用同知候補知縣陳福勳並由道商同上海英美兩領事派美籍譯官麥嘉締偕鄭永甯同搭輪船前往日本相機妥辦去後嗣據沈秉成稟稱陳福勳於八月二十七日俱到橫濱所有被拐華民已先由日本外務卿飭據神奈川縣權令大江卓自七月初四日起節次訊供至八月二十四日定案華人二百餘名均由中國派員帶回其瑪也西船從寬釋放陳福勳當將

華人趙亞好等二百餘名全行查收仍搭輪船從橫濱開行
日本外務卿復派領事官品川忠道沿途照料於九月二十
一日到滬由道分飭上海印委各員將該華民逐一查訊籍
隸廣東者一百九十六名福建二十七名湖南江西浙江各
一名除福建湖南等省人數較少酌給路費分交員董覓便
遣回其籍隸廣東而上海有親族可依亦准保領外尚存廣
東人一百八十七名當即派委候選通判劉光廉候補直隸
州黃國光搭坐輪船押送回粵旋據廣州府覆稱被拐難民
如數收到已分交各原籍州縣給屬領回一面嚴拿拐匪懲
辦等情茲復據沈秉成以此案辦理完竣稟請具奏前來臣

查此案應辦情形業經前署通商大臣何璟隨時咨報總理衙門查照並密咨兩廣督撫臣轉飭地方官務將拐匪訪拏嚴辦在案惟秘魯國船擅在澳門拐去華民至二百餘人之多行抵日本橫濱地方經該國官截留訊辦知會中國派員前往悉數帶回實由日本及英美各官認真襄辦俾該華民得慶生還且該華民在日本留養多日中國委員未經接管以前一切用項悉係該國支應迭經委員詢問數目以便歸款日本官均稱已由本國支銷不須送還出力出資極敦鄰誼尤堪嘉尚除飭道將英兵官美繙譯酌予獎勵一面備辦綢緞等物分送日本官員仍由臣照會外務卿致謝并咨明

總理衙門外所有前項被拐華民現已全數帶回資遣回籍
緣由理合繕摺具陳伏乞

聖鑒謹

奏 同治十一年十二月 日奉

硃批知道了欽此

閩督許奏設廈門保商局摺

光緒二十五年

奏為福建廈門設立保商局保護出洋華商恭摺具陳仰祈

聖鑒事竊照閩民流寓外洋遙歸故里多被官紳魚肉經臣諄勸

籍紳馳函招致並擬仿周官保富之法以示優待當於籌辦

農工商務摺內

奏明在案伏查閩民出洋皆籍隸漳泉以廈門為孔道復經嚴飭興泉永道汀漳龍道切實查辦去後茲據該道等查明出洋商民不下數十百萬類多居積致富不忘故土乃偶一歸來船夫索擾關卡苛求族鄰婦黨復捏欠勒捐肆意取盈藉端訐訟種種擾累不可勝言地方官襲故蹈常不為切實查辦以致言歸者轉悔噬臍聞風者相率裹足殊失懷保之道現擬於廈門設立保商局遴選紳董辦理函致東西會館首董遇有由洋回里電知該局並給文憑黏貼照相交給來局報驗渡載挑運概由該局照料回鄉隨帶行李不准關卡勒索留難如有仍前詐擾准受害之人稟局立予查辦等情會

詳請

奏前來臣查外洋流寓華民夙稱殷富平日急於公義凡遇賑捐善舉無不踴躍輸將可見桑梓之鄉時刻依戀祇以種種擾累遂觀望不前亟宜設法保護近來開鑛築路諸事往往因鉅本難集中輟者多如該商等回華當有所資藉且寄居外洋日久利弊皆詳悉無遺尤屬事半功倍臣現飭屬認真舉辦不時嚴密稽查儻奉行不力即從重參辦惟念該商等海隅散處一時未獲周知應請明頒

諭旨宣示遐邇庶

皇仁所播奔走僑來商務幸甚所有閩省擬設保商局緣由恭摺

具陳伏乞

皇太后

皇上聖鑒謹

奏奉

硃批另有旨欽此

南洋大臣鹿附奏設立商務局兼管南洋保商事宜片

光緒

二十六年

再查光緒二十四年間迭奉

諭旨飭令振興商務業經本任督臣劉坤一在於上海設立商務

總局委派在籍翰林院修撰張謇等辦理嗣於二十五年四

月間欽奉宣

諭仿辦福建保商事宜正在分行司道核議適值協辦大學士臣剛毅來江查辦事件商將該局裁撤節費濟餉均經

奏明在案旋奉

諭旨令各省設局試辦認真講求等因欽此當經本任督臣劉坤一檄委江甯藩司恩壽等妥議章程在於省城設立商務總局上海設立分局兼管南洋保商事宜於十月二十一日設局開辦凡商律商學商報商情諸事胥歸經理藉資調護一切經費暫於解存司庫籌賑彩票款內每月動撥銀六百五十兩一俟商務辦有成效再行籌還據江南商務局司道各

員詳請奏咨本任督臣劉坤一未及核辦移交前來臣查該局開設以來於庶務商情均有裨益所議章程洵稱妥善開支用費亦屬核實除將章程分咨戶部刑部總理衙門查照外所有設立江南商務總局兼保商事宜緣由理合附片具陳伏乞

聖鑒謹

奏

商部奏請 旨通飭保商摺 光緒二十九年

奏為請

旨通飭力行保商之政以順商情恭摺仰祈

聖鑒事竊維泰西諸邦以商戰立國其優待本國商民無不予以應得之利益保護煦育俾遂其生至於貿易盛衰之故與夫貨物出入盈虛消長之原亦無弗隨時體察偶有不便於商民致妨其生業者必為設法以輔翼之維持之其大要務在劑不平者而使之平此其商務所以蒸蒸日上也中國自互市以來未嘗不欲仿行其法徒以洋商應享利益載在約章遇有不平之事領事官即為伸理而華商勢弱力微其氣既不足以相聚且平日與官場隔絕其情又不足以相孚於是不肖官吏遂至專用壓力牽掣抑勒種種不平之弊商民有身受其艱苦而不能言不敢言者敬為我

皇太后

皇上詳晰陳之查洋商販運土貨祇在海關完納子口半稅領有三聯報單沿途呈驗無論遠近概不重徵而華商運貨出口則逢關納稅遇卡抽釐其所抽納之款已較洋商所完子口稅為多乃關吏卡員於照章應納稅釐外恒多分外之需索如此畸重畸輕土貨出口安能望有起色此其不平者一也運貨之宜務在迅速往往有一日之差旦夕之殊而貨價之漲落以倍蓰者邇來內港行輪運貨業經暢行無阻各處關卡委員遇掛洋旗之商船照章速驗放行遇無洋旗之商船即不免留難需索甚至今日不驗候至明日明日不驗候至

後日至於民船划艇更復任意欺凌華商隱受虧損而無如之何此其不平者二也商人經營懋遷良非易易偶有倒欠涉訟情事自應速為理直乃近來外省地方官於洋商詞訟尚不至故延時日而於華商涉訟往往積壓稽遲甚或居為奇貨苛索侵漁無所不至此其不平者三也凡茲數端華商每以相形而見絀繇是洋商中之桀黠者遂得行其招徠壟斷之計浸而久之華商亦且冒洋籍掛洋旗所沾之利息洋商安坐而均分之是使華人之資財半脫削於洋商之手而地方官吏且目之曰奸商夫以華冒洋誠可謂之奸商矣曾亦思為淵毆魚有養民之責者固不能不任其咎也臣等忝

廣

簡命綜理商政夙夜兢兢思有以仰副

聖明軫念商民之至意竊維保商之政不一而其竅要在辦事之務得其平惟是向來官商隔閡積習已深非嚴行整頓不足以資挽救應請明降

諭旨飭下各直省將軍督撫通飭各該處地方官嗣後華商販運貨物經過水陸關卡務須一律迅速查驗放行不准稍有留難需索至商人詞訟等事亦應速為理直毋得稽延時日藉端索費倘或仍蹈故轍有礙商情應准商民向地方官處告發或逕向臣部控訴一經查察得實即行從嚴參辦總之洋

商在中國貿易固應照約保護華商均屬子民尤應加以體恤不得稍有偏倚並不得多方苛派以昭平允而免向隅所有請

旨通飭保商緣由理合恭摺具陳伏乞

皇太后

皇上聖鑒訓示謹

奏

出使美國大臣梁附奏請獎勵駐秘通惠總局紳商資遣華

民回國片

光緒三十年

再臣前奉

諭旨保衛僑氓迭經札飭各領事認真遵辦在案茲據駐秘嘉里約領事陳始昌稟稱秘國流寓華僑老病無歸以千數計困苦情狀不忍目覩經與通惠總局紳董商民籌議捐廉倡導復分別勸募共集秘銀二萬二千餘圓訂僱船隻將老病華僑分批次第載運回國另備的款匯交香港善堂妥為安置俾得鄉關重返優養餘年業將第一批華民一百九十七名資遣安訖等情臣維近年秘魯等處華民工作漸稀往往流離失所若不亟圖安置勢必道殣相望不特有傷天和抑且貽譏外域該領事撫循僑寄分所應為據稱不敢仰邀獎叙自當准如所請惟該紳商等重洋遠涉生計艱難乃能仰體

皇仁慨捐鉅款將老病僑民資遣回國其顧全大體見義勇為較之尋常捐賑恤災尤覺難能可貴似應有以鼓舞而誘掖之庶幾間風興起愈多嚮善之人於保衛僑民不無裨益可否仰懇

天恩俯准將駐紮通惠總局紳商等傳

旨嘉獎以昭激勸之處出自

鴻施除咨呈外務部外謹附片具陳伏乞

聖鑒訓示謹

奏

盛京將軍增等會奏日俄戰事經過地方分別賑撫保護摺

光緒三十年

奏為謹將日俄戰事經過地方分別賑撫保護情形恭摺具

奏仰祈

聖鑒事竊日俄開戰奉省適當其衝所有戰事經過地方商民不免廢時失業奴才等已札飭各該管地方官詳細查明分別賑撫俾得及時耕作以免流離所需款項即由該旗民地方官庫存各款先行動支核實造報作正開銷並飭將各該管地面一切人民財產竭力彈壓妥為保護以期仰副

宸廑除分咨外謹合詞恭摺具

奏伏乞

皇太后

皇上聖鑒謹

奏

出使英法大臣郭咨英屬議收華民丁稅已照會英外部設

法禁止文

光緒五年

為咨行事據英國屬地噶叻利埠廣利泰源隆永祥太翼成
太昌源信宜棧等鋪商暨工作人等聯名稟稱竊商等籍隸
中國在亞美利加洲英屬什尼地省之噶叻利埠或販賣貨
物或受僱工作業已有年今春聞新議事官有苛派華人稅
銀之議滿擬本處謠言斷無是事查英國人在我中國既無

收稅銀之事豈中國人在英國有收稅銀之理及至六月間所聞已確並議定每人收稅銀每年四十大元不過管喊哆利官長尚未簽字商等即趕緊往見面議免簽據云此事由件尼地總督作主如無論來停止不能不簽商等旋由電報告知件尼地總督據覆云俟有稟到日須質訊後方能定奪商等遂延請狀師立巴臣作稟於八月初四日寄往件尼地尚未奉到批覆昨十一日有帶領番差前來催收稅銀者番言稅銀謂之忒士銀手持忒士紙聲稱奉憲代皇家收取每人按年納忒士銀四十大元分四季取如不照納下一禮拜即來搬取貨物以便充公等語本埠新聞紙亦如此說商等刻尚

推換未付而工作者已有被東人扣銀代納此例一行在商等蠅頭微利已屬不支工作窮民實難為繼且有游手之人日食尚難亦令照納勢更難行現在羣情洶洶恐激事端大局攸關瀝情上稟伏乞俯賜保護得遂生業商等不敢望英國格外優待但求與待各國視同一例實為甚幸等情同日併准出使美日秘魯大臣陳來函轉據該商等稟同前由商請本大臣轉咨免派前來當查英國所屬優待各國人民從無歧視該鋪商等或有與地方不相能之處亦應據事持平理論未便概加苛斂計布利比時科倫里亞總督應當查照藩部尚書通行章程設法禁止即經據情照會英國外部轉

咨藩部尚書照飭計布利比時科命里亞總督飭令免派以
安民業在案茲准外部照覆業已轉達藩部核辦除批示並
咨呈總理衙門及咨覆陳大臣外相應咨明須至咨者

右咨南洋

出使英法大臣曾咨英屬議收華民丁稅與例不符已作罷

論文 光緒五年

為咨行事現准英國外部照會上年十月初八日准前任大臣
來函內開噶龍巴議政院新議章程一條欲與該處中國商
民人等每年徵收丁稅四十元等因本部當將來函轉咨本
國理藩院尚書在案茲聞噶龍巴總按察司以該省議政院

權力不足所擬章程與例不符應行作為罷論又聞加拿大
省現亦正在核議此條可否不准施行為此照會到本爵大
臣准此查此案前據華商廣利泰源隆等商人聯名具稟免
繳丁稅情形並准出使美日秘國大臣陳來函轉據該商人
等稟同前由當經郭前大臣照准英國外部轉達藩部核辦
並咨陳大臣查照在案茲准前因除咨陳大臣轉諭華商廣
利等鋪遵照各安生業毋滋事端外相應咨明須至咨呈者

右咨總署

謹按噶叻利應作可羅你譯言屬地又言新埠也布利比時
應作布利地系譯言英國的也布利地系可羅你猶言英國

之屬地也香港新加坡錫蘭亞丁等處皆可稱此名噶龍巴則係此案所指之專名因前後所咨地石不同用特粘單聲明以備查核

出使英法大臣曾咨英屬議收華人丁稅已議不准行文

光緒

五年

為咨呈事竊照英國屬地噶龍巴議院前議欲於該埠徵收中國商民每名每年丁稅四十元一案前據廣利等商稟請免繳等情迭經郭前大臣暨本爵大臣照會英國外外部並分咨出使美日秘大臣陳暨總理衙門查照在案茲准英國外
部文稱以噶龍巴議院前定苛待該處華民之例經卡拿連

閣諭議不准行除由本爵大臣照復英外部並咨陳大臣轉諭該埠華商廣利等鋪人民勉為良善各安生業外合將往來照會鈔稿咨明查照須至咨呈者

右咨總署

附錄英國外部照會

光緒五年

為照會事前於本年正月三十日准郭大臣照會噶龍巴議徵華民丁稅一案比經本爵大臣轉請藩院查覆茲准藩院咨稱該院現由卡拏連總督接准本年八月二十二日卡拏連內閣飭諭言噶龍巴議院前定苛待該處華民之例已經內閣議不准行等因併據藩院將閣諭抄錄一道寄送前來

本爵大臣理合依據來文照會貴爵大臣查照

總署咨各省洋人居住地方凡遇考試地方官認真彈壓保護文光緒十二年

為咨行事光緒十二年六月二十七日准英國華大臣照稱重慶府城滋事重案及本國駐寓重慶繙譯官班被傷幾遭不測並寄居該處洋人房屋全行被毀各節此事確因重慶府考試武童而起務期貴署於他省居住洋人之處倘遇類此考試之事早行飭知地方官設法預先防範等因前來本衙門查洋人居住之處地方官理應照約保護各省每遇考試聚集多人最易滋事自宜預為防範相應咨行

貴撫轉飭地方官凡遇考試時務須切實曉諭認真彈壓毋任恃衆滋事以安民教而弭釁端是為至要須至咨者

右咨各省

出使英法義比大臣薛咨擬請英員保護智利厄瓜多流寓

華民文

光緒十七年

為咨呈事竊查本大臣前准出使大臣崔文稱秘魯所屬必沙灣意基忌登拏亞里架等處向有華商貿易自光緒七八年間秘魯與智利構兵將各地割歸智利管轄上年智利內亂不免滋擾中國與智利未訂約章無從保護有華商永安昌寶芳等稟請駐秘參贊轉求英國駐秘公使一面電達英

廷一面函託英國駐智公使保護旋准英廷電如所請諭令駐智公使一體保護極為得力又南美利加洲厄瓜多國亦有華人貿易該國別立新例苛禁華人亦承英國駐劄惠愛磯之領事張百喜駁除苛例俾得安業將來各該處華工有所請託自益靈通咨請代謝英廷等因本大臣當即照會英外部致謝英國睦鄰護商之意茲接英外部大臣照覆內稱英廷間得本國駐智利及厄瓜多之官員能幫助中國人民英廷深為欣喜請煩查照等因相應鈔錄往來照會各一件除咨行出使大臣崔查照外為此咨呈

貴衙門謹請查核施行須至咨呈者

右咨總署

出使英法義比大臣薛咨英員允許保護厄瓜多流寓華民

文光緒十七年

為咨呈事竊照智利厄瓜多華民經英國代為保護前准出使大臣崔來文當經致謝英國外部並鈔稿咨呈在案嗣准貴衙門函開該處華民得英官代為保護未當無益希請英外部諭令駐智利及厄瓜多兩國使臣領事如前保護俾華工得以安業益見友誼之篤等因承准此本大臣當備一牘照會外部茲准外部覆稱允為照辦相應將外部來往公牘咨呈

貴衙門請煩察照辦理須至咨呈者

右咨總署南北洋

出使英法義比大臣薛咨與法外部議除越南等處華民身

稅文 光緒十八年

為咨呈事竊查劉前大臣移交法署卷內有越南等處徵收
華民身稅一案自光緒十二年經許前大臣照會法國外部
以後懸隔五年之久至今尚未催辦本大臣查華民寄寓越
南三圻及東埔寨等處者約計三十萬衆其丁壯每歲所輸
身稅約計二三十萬兩之多苟能一律裁革實於華民大有
裨益即使不能儘數免徵第能使法國減去一分之稅則華

民即受一分之利前曾函達

貴衙門在案嗣於光緒十七年夏初據奉

貴衙門來函屬即與法外部商論旋因教案迭出口舌滋煩
停擱將及一年現稍安靜無事即已照會外部催其將前事
核辦除俟接到該部覆文再行咨呈外謹將此次致法國外
部照會錄呈

貴衙門存案備查須至咨呈者

右咨總署

出使英法義比大臣薛咨與英外部請刪除加那大苛待華

民新例文

光緒十八年

為咨呈事竊照英國屬地加那大政府苛待華民一案本大臣屢次與外部辯駁所有寓居加那大之華民不令其分別看待俾華民享受權利與別國之民相同乃近聞本年西七月初九日加那大域多利亞議政院新政一例係於一千八百八十六年所定華人入口之例第十三條修改以待寓居之華民更加嚴酷澳大利亞及加那大自主之屬地設立分別之例以治華民既不合中英條約之理亦與萬國公法相背本大臣因辦文照會外部請英廷設法令其革除俾華人往來加那大者可以自便旋接外部尚書伯爵勞德伯里照復內稱加那大政府改易一千八百八十六年華人入口之

例第十三條一節已轉咨藩部大臣俟接回音再當照復請
為查照等語除俟英外部如何照復再行咨呈外相應抄錄
往來照會各一件咨呈

貴衙門謹請查照須至咨呈者

右咨總署

粵督陶咨美國禁阻華工之約將屆期滿請酌核辦理文

光緒

二十七年

為咨呈事現據旅美金山商民司徒芳崔子肩等稟稱美國
禁阻華工之約將屆期滿計光緒十二年由出使大臣張蔭
桓畫押至今來美華人比前減半利源坐失固屬堪嗟但其

初尚謂經商教師游歷游學等人可以任便往還不意例愈出而愈苛諸多悖約即就經商舊客審問時稍有差訛即拘禁木樓嚴同囹圄探視弗許進食不容病不得醫信無能達必延律師詰駁得直者亦屬寥寥稍財力不齊撥還原籍奔波萬里慘辱備嘗靡不恨訂約者之既失於前痛守約者不力爭於後也夫以我粵族生息之蕃多倚外國為殖民之地以傭工而論全球上推美國最貴值焉按去年註冊核計旅美華人尚有八萬餘云每名雖計最賤之工按月亦可得美金銀二十元之譜統計全年可獲美銀一千八百二十萬元伸中國銀四千萬元似此天然利藪奚可更失機宜倘不藉

此滿期之際向美政府而力爭之不待三年必絕華人之跡於美利堅矣頃該工黨及報館攻擊不遺餘力有謂宜再增禁約有謂宜杜絕來踪准在華歷九月間由憲政院開議雖經繕就呈詞稟求星使誠恐遷延觀望關係非輕又不忍此數萬人之生業等比浪浮清夜以思無門投訴迫得稟叩拯斯及溺非不知無關於憲台政績冒瀆干求第以商等皆是粵人一經被逐歸來仍是沐恩治下際此米珠薪桂覓食艱難以憲台胞與為懷重念窮黎疾苦其傷及仁愛之心未嘗不更增煩劇也故敢瀝情叩訴懇即咨請外務部王公大臣令伍星使必要力爭禁例萬勿因循更由京商諸美公使求

以敦守約章消除禁約並請徑咨伍星使加意維持以重民
脈念此似為利源之失商旅之爭而實有關於

國家之大體所以商等不揣罪咎瀆叩台前萬乞俯順輿情挽
目前之急開後路之源俾國體之張便工商之益商等少小
離鄉謀生日感不諳稟詞體例統乞原宥等情據此當批中
美會訂限禁來美華工條約係光緒二十年二月所訂載明
以十年為期現在尚未屆滿所稱本年華歷九月間開議之
說似有未確惟所稟粵民賴此為生者甚眾必宜設法力請
弛禁以廣粵民生計自係實在情形原約本有如限期屆滿
須於六個月前將停止限禁之意行文知照現距期滿之日

為期不遠候咨請

外務部及駐美大臣酌核辦理等因除牌示遵照外相應據情咨請為此合咨

貴部謹請察照核辦再中美條約雖係訂於光緒二十年間美國禁止華工議章本年實已屆期滿另議之期可否先行就近轉商美使之處仍望酌奪施行須至咨呈者

右咨外務部

出使英義比國大臣張咨新嘉坡回華商民准給護照俾沿途關卡不得刁難勒索文

光緒二十八年

為咨呈事本大臣於光緒二十八年六月十七日據新嘉坡

領事鳳守儀稟稱茲據職商賴顯榮等稟稱近來旅洋華商
時常回華所帶行李零星物件沿途關卡除查無應稅貨物
外劣役人等節外生枝特意刁難多方索詐不遂其欲任意
搜求兼之惡棍土豪目為番客強求強取恣情魚肉以致商
民視內地為畏途以外洋為樂土逃入外籍求援外人者紛
紛皆是職商等目覩情形萬難隱忍不揣冒昧伏求恩准發
給保護回華商民行李物件護紙粘貼箱籠查驗放行兼於
發給護照外每紙加給移知該管地方官保護公文一角遇
有鄉豪里棍藉端魚肉等情准其到該管衙門投告其所有
具領護照護紙之人恐有奸商混淆匿私漏稅諸弊請由職

商等詳細查明每紙蓋上職商鋪號姓名妥為具保以絕流弊伏求轉詳

欽差出使英義比國大臣張批示立案專由職商等經保以專責成各等情前來伏查旅洋商眾近極顛頤異地羈留其心恆不忘中土乃時常返里每被土豪惡棍嚇詐多端任意魚肉以致拋棄鄉井久客不歸求援外人進入外籍者竟如水之就下獸之走壙且我華鉅商殷實夙以南洋為最夥設不極力保護使其有心回華則內地財源盡行壅塞而所謂鉅商殷實者皆非中國之所有矣邇來

明詔煌煌諄切保商事務而各大憲民瘼關懷亦無不時籌善法

其奈上多立法而下無奉法之人積弊難除商民受困雖有一紙護照而胥役視為具文商民亦當為廢紙卑府早夜思維計無從出惟有痛除舊弊亟立新章不尚虛文實事求是總要到底保護勿任劣役土豪恣肆魚肉方稱妥善但新嘉坡五方雜處良莠不齊奸商蠹賈難免混淆其間該商等或久客多年或生長斯土其中情弊自應深知所有回華商民除查係確實良善外一面著該職商等具保前來准給護照護紙分別收執實貼箱籠沿途照驗放行不得刁難勒索並於護照外每紙加給移知該管地方官實力保護公文一角遇有土豪惡棍任意魚肉諸情弊准其將文投遞該管地方

官請其出力保護似此辦理則旅洋華商自不致視內地為畏途以外洋為樂土求援外人逃入外籍上不失中國之權體下可通內地之財源攘往熙來曷其有極卑府忝供厥職責在保民惻念商艱奚容緘默不揣冒昧據情上陳是否有當伏乞憲台察奪批示並咨呈

外務部及閩粵兩督憲通飭各屬嗣後如見卑府護照護紙及移知公文等件務須實力保護切勿視為具文等情到本大臣據此除批示外相應咨呈

大部請煩查照察核施行須至咨呈者

右咨外務部

外務部咨古巴商民稟請立約保護咨行妥辦文 光緒二十

九年

為咨行事光緒二十九年正月十一日接據古巴中華會館
閩埠華商工民等稟稱商民等旅居海外遙戴

皇仁流寓本島各埠不下二萬餘人今年古巴自主舊約已廢新
約未立若不速訂條約並將禁止華人入境之例刪除則數
萬僑黎利權盡失稟求咨行新任梁大臣抵美之後早日來
古議訂條約等因前來本部查前因古巴立為自主之國該
處僑寓華民甚眾經本部奏請以駐美使臣兼充古巴使事
頒發國書就近與該國議立新約俾資保護等因均經奉

旨允准咨行欽遵在案旋值前任伍大臣奉

命回華未及辦理茲聞該處華商等來稟情詞甚為迫切相應照

錄原稟咨行

貴大臣查照於到任後早日與古巴國商訂條約妥籌保護
免致僑氓失所是為至要須至咨者

右咨出使美日秘古大臣梁

外務部咨駐津日本領事代保護韓國商民轉飭遵照文

光緒

三十年

為咨行事本月十四日准韓國閔使照稱准外部文開以天
津地方流寓我商民保護須設領事刻值未遑經政府會商

日本政府以駐津日本總領事伊集院彥吉暫行代為保護
所有代為保護之領事應享利益與日本總領事一律施行
請咨行北洋大臣照認一切復准日本內田使函稱前因業
奉本國政府訓條轉飭駐津總領事遵照辦理各等因前來
相應咨行

貴大臣轉飭該處地方官照認可也須至咨者

右咨北洋

外務部咨轉飭各口遇有俄國紅十字會船隻進口按約辦

理文

光緒三十年

為咨行事本年三月十一日准俄雷使照稱刻有本國紅十

字會蒙古哩雅號輪船一隻在旅順口或將來仍有紅十字會船隻倘迫近中國口岸煤斤不敷用及有偶買食用與避難他故等情為免各項誤會之處請飭中國各口岸地方官遇有俄國紅十字會輪船來時照以上所言各事請按照荷蘭一千八百九十九年七月十七日所定養病院船隻在中立口岸條約合理助以方便之益利等因前來本部查光緒二十五年荷蘭保和會內所定推廣紅十字會行之於水戰條約中國業經畫押現值日俄事起戰國與中立國均應一律遵守茲准俄使照稱前因相應譯錄原章十條咨行貴大臣轉飭各口岸地方官遇有俄國紅十字會船隻進口

隨時查明如與會章不背按約妥為辦理可也須至咨者

右咨南北洋

外務部照會日俄公使允認紅十字會前往戰外各地文

光緒

三十年

為照會事中國商董在上海與各國商董合辦紅十字會前
經商請

貴大臣轉達

貴國政府照允尚未定議近據上海商董等電稱所有中西
合辦紅十字會祇在戰場外附近處設醫院收治戰國各國
傷病兵民救護無關戰事人民出險現在營口已設醫院即

係如此辦理擬由滬派人繞道天津前往會同趕辦等因旋據
商董張慶桂等稟稱擬即馳赴營口遼河以西及田莊台溝
帮子新民屯一帶戰外各地招呼被難商民附搭輪車速離
險境按照公法中立條例均無違礙懇請發給護照並照會
日本駐京大臣簽字以便前往等因本部查紅十字會為各
國最要之善舉現值

貴國與^是國用兵中西商董合辦此會在戰場外附近處收
治傷病兵民救護被難人民出險其辦法宗旨均與中立公
例相符當為

貴國所深許相應照會

貴大臣查照允認迅即見復仍由本部繕就護照送交

貴大臣簽字俾該董等執持前往按例妥為辦理實細公誼
須至照會者

右照會日俄公使

東撫周咨戰境商棧貨財應由戰國保護請商日俄公使查

照文 光緒三十年

為咨呈事案據農工商務局詳稱據烟台商董候選州同梁
禮賢等稟稱竊商等奉到札諭並抄發局外中立條規三十
五款又續奉到札諭民船各事詳細辦法五條遵即傳諭各
商一體遵照辦理惟查烟台生意多賴旅順口青泥窪海參

歲北方一帶等處為運銷滬注之地故各該處之設分莊行棧者不下數千百家今值俄日兩國構難與我商民無干也乃口岸封堵商人之禁約彼處者既無保護又無寄託身命財產兩不可保側聞公法所載凡局外國之商貨財產寄在戰境者均得開列清單數目報明該國外部俟戰事完竣後由其照單包賠各國皆倣此辦法商等伏查札諭內所頒中國應享局外之權利第七款內開我人民寄居戰境身家財產均仰該國保護不得奪其資財等語亦與公法宗旨畧通今以烟台一埠計之旅順等處貨物財產約有數百萬而保護全無獨不得比於各國之開單取償致令商人毫無依託

於槍林彈雨之中無奈棄其資財血本迂道由山海關等處
逃命潛歸似此數百萬資財淪於戰境毫無歸著烟台刻下
蕭疏異常再罹此鉅劫各行號萬難支持實與商務大有關
礙為此公請俯鑒商情軫念商艱恩准設法轉行咨請保全商
等感戴無既等情到局正在核辦間又據該董等稟稱竊商
董等前以旅順口大連灣青泥窪海參崴等處戰境烟商所
寄財產貨物等項約計不下千百萬業經稟請設法保護並
援萬國公法賠償例擬請照會戰國備案存查各等情在案
茲者旅順等處尚在構衅未釋而我華在中已經興辦萬國
紅十字會善舉藉可拯救華民並財產等項於是烟台各商

號凡在旅順等處寄存貨物財產者皆來商會開單稟報求
為稟懇轉詳咨請商部大臣知照戰國按單開總數保護賠
償等情商董等統核單開總數共銀一千一百八十七萬八
千零七十九兩零一分另有清摺備查伏思此項鉅款皆商
民脂膏血本所積儻聽其淪沒戰境不為保全則商情大阻
商困益甚實與商務消長大有關係理合據情代稟伏乞轉
詳撫憲咨明

商部知照戰國一體保護等情並呈清摺一扣到局據此本
司道等查吳氏公法便覽論戰國與局外交際之例其第十
節載凡兩國用兵於局外之旂號官員財物以及民間不犯

軍例之生業財產務須加意護持一有疏忽侵擾即為干犯局外之權利又惠氏萬國公法其第三章論戰時局外之權第四章論和約章程均載有原主討還戰者交還法院斷令賠還各專條今日俄戰事未息吾華守局外中立之規凡旅順口大連灣青泥窪海參崴北方一帶俱係戰境烟商分設行棧寄頓財產貨物約計所值不下千百萬兩自應按照公法所載剴切申明由戰國實行保護如有損失俟辦理善後查明賠償庶足以恤商情而昭公允除批示外理合照造清冊詳請鑒核俯賜咨請

商部存案備查並請分咨

外務部暨

北洋大臣轉商駐京日俄公使一體查照辦理實為公使等情到本部院據此除詳批示並分咨外相應咨呈
大部謹請查照辦理望切施行須至咨呈者

右咨外務部

俄雷使照會旅歲華民身命財產已飭屬盡力保護丈
三十年

為照復事光緒二十九年十二月二十七日接准

來照內開據海參歲委員李家驤電稱俄日失和旅歲華民甚為惶恐請轉達俄政府保護旅歲華民身命財產等語前

來本大臣據本國欽命遠東留守大臣業已囑飭各該官員
將在所轄各地旅住各國官民之身命財產盡力保護與平
時無異相應照復

貴王大臣查照可也須至照會者

新嘉坡總領事劉玉麟請通飭保護南洋回籍商民稟

光緒

二十五年

敬稟者竊查南洋流寓華民大半籍隸閩粵自弛海禁久客
思歸懋遷往來行裝絡繹運資回里者有之置產故鄉者有
之旋因滿載而歸動遭羨忌或為鄉里魚肉或為吏役欺凌
或構釁以陷其身或藉端以罄其橐甚至宗支墳墓橫被侵

吞新構田園立遺蹂躪當經前總領事黃遵憲稟由前出使大臣薛

奏准示禁在案無如日久玩生復萌故態職道訪聞該商民等回籍之後仍有地方棍徒無賴紳衿紛投索擾脅制百端商民以衆寡不敵孤掌難鳴多隱忍而受其挾詐遂致風聞相戒視華籍為畏途對故鄉如荆棘凡在外洋經商廣有資產者悉皆望洋裹足惴惴焉有不敢回里之勢前車之鑒覆轍可尋此實外洋商民之實在苦衷也伏思

朝廷民胞物與一視同仁豈忍聽此數百萬黎民棄遺海外况近來水旱頻仍時聞告匱內地餉源日絀度支維艱各省賑項

多有在南洋捐集者即使一隅之款無裨大宗而集腋成裘不無小補該商民等既能不分畛域推解情殷尤當團結其心因勢利導以資臂助擬請札行興泉永汀漳龍道通飭各屬一體知照凡嗣後閩籍商民由外回里者務令責成該地方官實力保護不准蠹吏土惡恃蠻逞兇仍前索詐由玉麟將回里各商民逐名登冊按季移送廈門道存查如該商民等由籍回洋有來稟稱在籍時曾受誣詐者准由職道具稟憲轅飭下嚴查澈底究辦以除積弊如此整頓庶外洋商民得以往來自適遂其初心即將來內地各項捐賑亦可冀其踴躍不致藉口無干相率袖手似於行商賑務兩有裨益儻

三十一
蒙核准俟奉批後即由職道在南洋各屬通行曉諭以安商情而利行涉此為保護華民起見是否可行謹祈批示訓飭祇遵

寓美華商呈華工禁約已滿請力爭補救稟 光緒二十七年
美國各埠華商崔子肩唐瓊昌何利司徒芳等五萬六千人
稟為禁約已滿請及時設法以挽利權而存生路事竊商等
旅居美國垂數十年自道咸之間華人接踵來美者十餘萬
計或工或商獲利頗厚而美人相待尚合公例故相安無事
咸稱樂土自光緒八年倡禁華工之說苛例暫增來美之徒
畧形不便然約款未成雖或非理已甚猶得致辯至光緒十

二年出使大臣張不能設法力爭遽行盡押於是例禁已定
無可挽救當是時也工禁雖成然經商遊學遊歷教師諸色
人等尚可隨時往來無或留難至光緒十九年出使大臣崔
忽許美國華工註冊之例自是而後華人來美者止於此矣
然新客雖不來而舊客尚可復至經甲午以後師徒撓敗情
見勢絀底蘊盡露欺貌日甚華人回國多不能復來者其阻
商務而失利權已不可勝計矣去年拳匪之亂至今相隔一
年而苛例百出令人駭絕無端誣以疫癘而有圍埠之舉無
端目以不潔而行洗埠之事騷擾危險之狀慘不忍言凡約
章所載經商遊學遊歷教師四類可以來美者今則富商巨

賈講學老師多望洋興歎不能遽登彼岸矣商業敗於半途
學子無所教誘既貧且愚言之哀痛至於遊歷遊學二事有
供詞一語之誤護照一字之訛立即逮解回籍不得以情理
論者華人到埠之時不問其合例與否即囚之於馬頭木屋
中寢食於斯內外隔絕親友不得一見律師不得一問即有
疾病醫生亦不得診視黑暗穢臭過於監獄壓制苛暴甚於
犯人幽禁常數百人羈留常數閱月而護照束閣關吏無一
過問因此之故有懸梁自縊投海自盡失醫致斃之慘者凡
埠中華人輒遇痛毆亦無如何巡差任意挾人良反不分即
遭重罰華人以常病致死亦須戮尸由別國逃美一經查出

多被刑殺餐館則禁華人之飲食客店則禁華人之止宿戲園則禁華人之觀看房屋則禁華人之租賃醫院則禁華人之養病小學校則禁華人之入學種種慘毒我華人皆目覩而身受之知之而莫敢言言之而莫敢與校十年以後華人是跡絕於美境矣來年四月禁約已滿今年九月其議院即開議是事近者舉國工黨聯衆數十萬稟請議院嚴禁華人事在必行其國中報紙有以為宜盡逐華人者有以為宜遷華埠於境外者有以為宜再嚴立禁約二十年者有自稱為美國義和團專以虐待華人為事者有自誇為富強之國即焚殺華人亦不必賠償者如此謬論如此苛法不獨海內人

所未信即海外人數年以前亦所未信也商等千辛萬苦累受荼毒久欲速歸故鄉別圖生業雖謀生不易而受侮之事尚不至是竊思美國華人約有十萬之多統計每人一年所得工銀可值中銀四百元合十萬人計之已有四千萬元而商務之盈餘貨物之入口尚未計也自顧大局益危公私交困列強賠款多至八萬萬九千萬兩即使舉國之人三歲不食竭力羅掘亦無以供此漏孔也以昔年國餉論之所入不過九千萬而美國華工之款已將半矣使商等盡行來歸一年之間頓失四千萬際此民窮財竭司農束手之時從何處得此巨款以為

國家之助乎且禁華人之事亦非獨美國為然也頃加拏大則加重稅矣檀香山則註冊矣小呂宋則限制矣新金山各埠則嚴禁矣南北美洲除墨西哥秘魯古巴巴拿馬諸埠外餘皆禁絕矣使美埠華人盡絕於美境諸國紛紛效尤利源立銅生路已絕當此游民載道羣盜滿山髮捻紅回之亂必復見於今日矣故為美屬各埠之事小為海外各埠之事大為海外各埠之事小為中國大局之事大此商等所以覩此危急之境憂憤迫切而不能已於言者也夫泰西諸國自均勢之法既定咸專力異域以為殖民之地故非澳美諸國以及太平洋南洋諸羣島東亞諸弱國皆遍白人之迹矣我中國數

百年來僅有六百萬人漫行於海外各埠以與異種相競爭
為殖民之基礎一旦委而去之百年之功廢於一旦近招失
利釀亂之大災遠貽亡國滅種之慘禍不大可痛哉

王爺大臣

乃心大局洞悉後患久諳外交之術素善懷柔之策和

議賴以成危局賴以安海外工商同深感激禁約一事伏乞
照會駐京美公使按約婉商妥立新約并電飭出使美國大
臣伍向美廷力爭千鈞一髮在此一舉過此以往大錯已鑄
雖有蘇張之口不能搖其舌矣夫此次和議之事美國首倡
撤駐兵減賠款故和議之成固由於旋轉之功而美國提倡
之力不無小補也所以交涉之事與美國尚屬易辨若於三

月內按約與爭華工之禁縱不能廢然使遊歷遊學經商教
師諸例可以隨時來美無或留難則挽利權而開生路其益
自不淺矣商等才力綿薄未能張國威傳種類與各國相抗
衡以報

國家於萬一其有負

朝廷之美意固已多矣伏乞小恕前愆速為拯救則再造之德中
外同戴不勝惶恐企望之至